

**HUN LE MUN**  
*(Time and Place)*

Hun le mun ii hongbawl-in, i kikhen a,  
Hun le mun ii hongbawl-in, i kigamla tazen hi.

Hun le mun in eite hong angvan denzo lo a,  
Hun le mun in einih kalsinthu albang mangsak  
den hi.

Omkhawmnuam, khawlkhawmnuam lai pipi in,  
Hun le ni hongcin ciangin, sangi bangkhen in,  
Eima munciat i zuanta hi.

Aw! Hun le mun in hongsimmah zenmah si e  
mah...

Uk theih hi in, tawi theih hi le cin,  
Hun aw, kadeih bangin hong uk in,  
Mun aw, ka utna peuhah pakbang hongtawi  
kawikawi nuamzen sing e mah.

Tu in lah,  
Hun acin ciang, na ut namun ah kei nongkha a,  
Hun acin mateng, hihlai ah om in nongci zen mah.

Hun i zang khawmden thei kei a,  
Mun zong i nei khawmden zo tuankei hi.  
Hun le mun in eihongkhen ciang, bangin  
hongkizomsak zentam mah?

Hong kizomsak dingthu kalungngaingai a,  
Anuai a thupawlkhat kamu hi.

Upna akibangin neikhawm leng,

Itna akibangin nei khawm leng,  
Lametna khat nei khawm leng,  
Ngiimna le geelna akibangin neikhawm leng,  
Tupna le sawmna akibangin neikhawm leng,  
Veina le lawpna neikhawm leng,

Hi thute neikhawm leng,

Hun le mun te'n, ei hongkhen zolo dinga,  
Ni le kha te'n, ei kizopna lobang tulsak zolo in,  
Sihna leh natna in zong, ei kizopna patpuanbang  
siasak zolo ding himah ven maw...

Alum avot in, hongkhen zolo dinga,  
Nopna dahna in, hongkhen zolo in,  
Hauhna zawnna in, hongkhen zolo mahdinghi ven  
maw...

Tu-in Hun le Mun aw, koikuam sawlbang nong  
heisan ta uhhiam?